

Inuit innarluutillit pisinnaatitaaffii pillugit isumaqatigiissummut 13. december 2006-imeersumut Kalaallit Nunaata nammineq atuutilersillugu tapiliussamut ilanngunnissaa pillugu Inatsisartut aalajangiiffigisassaattut siunnersuut
(Peqqinnissamut Inunnnullu Innarluutilinnut Naalakkersuisoq)
pillugu

Ilaqutariinnermut Peqqissutsimullu Ataatsimiititaliap

Siunnersuutip aappassaaneerneqarneranut

ISUMALIUTISSIISUTAA

Ataatsimiititaliaq suliarinninnermini uku ilaasortarai:

Inatsisartunut ilaasortaq Pipaluk Olsen, formand
Inatsisartunut ilaasortaq Aki-Matilda Høegh-Dam, siulittaasup tullia
Inatsisartunut ilaasortaq Bo Martinsen
Inatsisartunut ilaasortaq Paarma Lund Kreutzmann
Inatsisartunut ilaasortaq Anders Olsen

UKA2025-imi ulloq 26. september siullermeerinerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Inuit innarluutillit pisinnaatitaaffii pillugit isumaqatigiissummut 13. december 2006-imeersumut Kalaallit Nunaata nammineq atuutilersillugu tapiliussamut ilanngunnissaa ilanngunnissaa siunnersuutigineqartumi matumani siunertaarineqarpoq. Inunnut ataasiakkaanut maalaaruteqarfiusinnaasumik nutaamik pilersitsinissamut imaluunniit inunnut ataasiakkaanut eqimattakkuutaarlutik isumaqatigiissutip innarlerneqarsimaneraaneq pillugu Naalagaaffiit Peqatigiit inunnut innarluutilinnut ataatsimiititaliaanut maalaaruteqarsinnaalernermik kinguneqassaaq. Nunatsinni maalaaruteqartarfiit tamarmik periarfissaajunnaarsimatillugit eqqartuussivitsigullu suliarineqarnissaa pineqanngippat maalaaruteqarsinnaaneq naatsorsuutigineqarpoq. Taamaaliornikkut isumaqatigiissutip annertuumik aqqissuussamilluunniit innarliisoqarsimasinnaaneranut atatillugu nammineerluni suliniuteqarnissaminut ataatsimiititaliaq periarfissinneqassaaq. Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat 2024-2034 malinneqarnissaanut iliuusissatut pilersaarut Naalakkersuisut suliniutaannut ilaareersoq Naalakkersuisut tunngavilersuutaanni ilanngullugu allassimavoq.

Siunnersuutip Inatsisartunit siullermeerneqarnera

Siunnersuutip siullermeerneqarnerani tapersorsorluarneqarpoq immikkoortullu ataatsimiititaliami suliarineqarnissaa innersuunneqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Siunnersuutip piviusunngortinneqarnissaanut aningaasatigut kingunerisassaatut taaneqartut siunnersuutigineqartumut naapertuuttut ataatsimiititaliap maluginiarpaa, taamaalilluni nammineq atuutilersillugu tapiliussamut ilanngunnissaa pisortanut inuussutissarsiutilinnulluunniit aningaasatigut annertuumik kinguneqarnissaa naatsorsuutigineqanngilaq.

Siunnersuummut ataatsimiititaliap oqaaseqaatai

Siullermeerinninnermi inuit innarluutillit pisinnaatitaaffii pillugit oqallilluartoqarpoq, siunnersuutigineqartorlu partiinit tamanit tapersorsorluarneqarluni.

Nalunaarsuiffimmut ilanngunnerup kingorna suliat qassit Danmarkip suliarisimanerai Peqqissutsimut Naalakkersuisoqarfiup misissorsimagaa ataatsimiititaliamit maluginiarnaqarpoq, siunnersuutigineqartumilu allassimavoq suliat marluk Danmarkimi suliarineqarsimasut. Nunatsinni maalaaruteqartarfiit tamarmik periarfissaajunnaarsimatillugit Naalagaaffiit Peqatigiit inunnut innarluutilinnut ataatsimiititaliaanut maalaarutininik tunniussaqaarnissaq piumasaqaatit ilagivaat. Siunnersuutigineqartoq akuerineqassappat Kalaallilu Nunaat nammineq atuutilersillugu tapiliussamut ilanngutissappat, siunnersuutigineqartup piviusunngortinneqarneratigut maalaarutigineqartartut amerlassusaat Naalakkersuisut eqqumaffiginerulissagaat ataatsimiititaliap naatsorsuutigaa, inuit innarluutillit pisinnaatitaaffiisa eqqortinneqarnissaannut tunngatillugu annertuumik ajornartorsiuteqartoqarneranik tikkuussisuusinnaammat.

Ataatsimiititaliap inassuteqaatai

- Ataatsimiititaliap isumaqatigiittup siunnersuut akuerineqassasoq inassutigaa
- Taamatuttaaq Naalakkersuisunut kaammattuummik imaattumik ataatsimiititaliaq saqqummiussaqaarpoq:

”Siunnersuutip matuma atuutilersinneqarnissaanut piviusunngortinneqarnissaanullu tunngatillugu Naalakkersuisut peqqissaarussinissaannik, matumani ilanngullugu inuiaqatigiinni inuit innarluutillit pisinnaatitaaffiisa pingaartinneqarnissaat,

pitsaassutsip qulakkeerneqarnissaa malitsinneqarneratalu nukittorsaavigineqarnissaa pillugit ataatsimiititaliamit matumuuna kaammattuutigineqarpoq. Ilanngulugu naammagittaalliuuteqarnissamut periarfissanut ilitersuutit siunnersuutillu innuttaasunut pissarsiariuminartuunissaat paasiuminartuunissaallu Naalakkersuisut qulakkiissagaat kaammatorneqarput”.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Pipaluk Olsen
Siulittaasoq

Aki-Matilda Høegh-Dam
Siulittaasup tullia

Bo Martinsen

Paarma Lund Kreutzmann

Anders Olsen